

小

草

齋

集

小草齋集卷之二十九

陳留謝肇淛著

友人孫昌裔校

七言絕句三

閨夢四時詞四首

寶篆殘煙遶翠屏
流蘇低映遠山青
一雙蝴蝶穿花去
百轉流鶯喚不醒

茵蔯香風綠錦池
水紋珍簾晝相宜
爲雲爲雨飛何處
未許襄王便得知

小意集卷二十九
蕙帳初寒促織哀早霜殘月夜雲迴雲中斷鴈
休相喚正在西風百尺臺

寶鑪雙鳳辟寒犀汗漬芙蓉翠幄低正是天山
飛雪夜香魂不度玉關西

度徐源嶺二首

閩山行盡楚山多鳥道千盤鎖辟蘿十里鵝湖
青不了客心無奈白雲何

徐源高挿瘴雲鄉曙色淒淒嶺路長馬上夢回
人萬里古槐花落鴈啼霜

鄉溪道中

山勝燕支水勝苔白蘋秋冷鴈初回斜陽欲下
馬蹄急處處香風桂子開

道中見菊

馬上鄉書久未裁籬邊黃菊爲誰開客魂已化
隨陽鴈盡逐西風一夜回

過徐橋是徐孺子故居

南州門巷草蕭蕭下榻高風久寂寥滿目荒邨
人不見夕陽殘雨過徐橋

過羅溪堤

羅溪溪水碧連天十里長堤樹拂煙八月西風
吹怒浪雪花飛到馬蹄前

憇玉嶺

雙旌迢遞出雲端玉嶺孤村路百盤立馬虛堂
秋寂寂滿窓風露竹聲寒

宿南浦驛

古驛荒涼草樹深蓮花漏斷鴈聲沈豫章城裏
家家月一夜西風幾處砧

望廬山

蘇子瞻謂不識廬山真面目只緣身在此山中
余立馬山外不惟面目愈遠亦覺神情了
不相接昔康樂爲遠公所擯今不佞復爲王
程所逼豈山靈與吾家固無宿因耶書之以
發一笑

蓮花風動翠微間瀑布無聲白鶴閒十載雲松
巢未得夕陽馬上看匡山

白蓮池

有引

自遠公手植白蓮千載杳絕至萬曆癸巳從
祖大司農公開府章貢路出東林見白蓮一
枝無根而茁爲之驚喜命寺僧守護因爲甃
池廣植其種自勒碑以紀其事迨今二十年
池荒荷殘斷碑委地司農墓草亦且宿矣感
而作此蓋不勝山陽之慟也

白蓮重發遠公房事去人非又十霜敗葉滿池
風瑟瑟殘碑無主卧斜陽

潯陽逢故人

君因流落滯天涯我爲逢君轉憶家把酒相看
俱下淚傷心不爲聽琵琶

宿潯陽

九派寒江望渺茫西風吹鴈度潯陽蘆花如月
天如水何必琵琶始斷腸

潯陽渡江追思戊子歲余卽有江北之行
荏苒於茲二十五年矣而風塵驅逼尚
未已也撫髀之感情見乎詞

北風吹露欲成霜隔岸垂楊葉盡黃二十五年

塵似海不堪重見此茫茫

憇小池驛後有茶池是盱江羅汝芳麓嶺
南楊少宰起元有碑

古驛何年甃曲池行人下馬讀殘碑只今池畔
餘衰柳落日西風不耐吹

九日風雨潛山道中

愁風淒雨冷征袍暫把茱萸泛濁醪客路三千
俱鳥道不須今日始登高

雨中度北峽關

溪流屈曲路巉巖
細雨斜風轉不堪
惟有馬頭雲霧裡
青山一片似江南

、村庄

池頭鵝鴨窰頭春
茅屋松門自結鄰
犬吠竹籬人未起
不知路上有風塵

、桃城鎮

青山歷盡見平田
曠野蕭條接遠天
何處寒雞啼落日
白榆影裏數家煙

廬江道中見風沙

四野黃塵欲暮天行人駐馬泪潸然自從歸去
江南路不見風沙已一年

馬上戲作平仄二體

松風嘈嘈鳴高秋衰楊低垂清淮流天長山寒
行人愁黃昏吹笛邊城頭

日落未落照四野偶過茂樹欲繫馬塞外嘹唳
一鴈過客子簌簌兩泪下

重過濠上有感

落日蕭蕭淮水平長堤新築柳初成十年蹤跡

渾如夢惟有遊魚不世情

中都道中

淮河如帶樹層層宿露寒煙曉尚疑王氣葱葱
何處起泗州直北是皇陵

度淮河

長堤水落草蒙茸鷄犬桑麻處處空聞說秋來
淮口決臨淮城在浪花中

宿州風沙

北風吹草復吹沙雙汨闌干落戍笳家在江南

佳麗地紫薇花謝木犀花

重過符離渡有感集句四首

夜半鍾聲到客船
月光如水水如天
無邊落木蕭蕭下
風景依稀似去年

野渡無人舟自橫
幾家同住一孤城
傷心欲問前朝事
一夜秋風白髮生

鴈歸河渚夕陽空
驅石何年到海東
風景蒼蒼多少恨
人歌人哭水聲中

萬井千山海氣秋
寒鴉飛盡水悠悠
行人自咲

不歸去來往風塵共白頭

過彭城

戲馬臺空落日愁一聲羌笛楚雲秋無情淮水
平如練猶咽西風不肯流

亞父塚

事定何須恨沐猴乞歸骸骨亦奇謀烏藏弓盡
韓彭醢不及彭城土一丘

彭城道中

荒原百里斷孤村日落山腰見水痕惆悵不須

論往事彭城今有未招魂

入齊界

楚山淮水苦風煙纔到滕陽又一天
溝外短牆墻外柳一條官路直如絃

滕陽曉發憶昔計偕之初履霜戴月風景
宛然聊題郵壁兼以自嘲

風吹缺月半昏明馬首匆匆已一程
三十年來頭白盡猶拖殘夢逐人行

過嶧山懷陳伯全太史伯全去歲以遊嶧

山得疾不數日卒

生死浮萍此地分
霜猿風笛不堪聞
夜深靈爽知何處
明月孤峰一片雲

孟廟

邾城東接嶧山煙
亞聖芳祠古道邊
一片濃陰山木合
虬枝拂地不知年

途中示家人

霜催畫角晨慵起
月照銀鞍夜未眠
惟有蒼頭偏稱意
騎人官馬索人錢

渡汶河

霜飛月落野雞啼霧鎖長林水拍堤夾岸人家
寒未起孤舟已過汶河西

別意

春風榆筴正飛錢堤柳絲絲拂別筵若使榆錢
堪買喚柳絲亦解繫郎船

夜入阿城索炬不得冥行舍許

山城迢遞易斜曛星斗依微路不分却憶使君
行部日火城十里散香雲

三歸臺

霸業蕭條世已非尚餘此地有三歸如今一片
荒煙裏風打榆錢布穀飛

過東郡二首

長堤十里水悠悠旌節猶迎舊細侯最是堤頭
楊柳色照人憔悴不勝秋

十年踪跡半沈浮腸斷城南望岳樓煙火萬家
河遶郭却疑此地是并州

阜城感事二首

平田漠漠水痕新
目斷荒村不見人
官府高懸招撫榜
風吹白骨已成塵

水旱頻年去故鄉
歸來無復舊封疆
土房崩盡親隣死
落日妖狐拜路旁

平原道中二首

青絲步障挽香車
十里塵浮白臯駟
苦水橋邊爭趕集
晚風吹動木棉花

進香士女競如雲
油壁青驄隊隊分
車載絳旛頭貼勝
碧霞殿上禮元君

經獻縣

雲裏荒城閑夕陽
寒煙疎樹遠蒼蒼
五陵無主山河改
猶有行人拜獻王

入長安二首

丹鳳高樓直北開
西山無恙客重來
白雲不肯山中住
却到長安第六回

斗轉宮城禁漏疎
觚稜斜挂月饒餬
家人見月空相憶
不道今宵到得無

安平喜家室至

曾分銅虎六年符岱色河聲總不殊少婦不知
人事換歸來猶問折腰無

倉頡墓

紫藤花落閉孤墳蒼蘚猶疑鳥篆紋雨裏荒祠
煙火斷空餘山鬼哭寒雲

田真墓

汶河如帶日西斜禾黍荒村四五家惟有田真
墳畔樹春風猶發紫荊花

龐涓井

沙埋白骨草沈碑
戍壘蕭蕭落日遲
關智爭雄渾似夢
西風七十二琉璃

甲寅桃丘立春

萬井千門寂似秋
不裝花勝不鞭牛
老來免得知年歲
一度逢春一度愁

秋閨

榆關七月鴈初來
十萬征人半未回
羌笛叫霜天似水
勸郎莫上望鄉臺

戲題白頭扇

紫杏夭桃十二樓
家家春色醉皇州
千紅隊裏鶯和燕
笑殺山翁雪滿頭

明妃詞

遠嫁胡天亦主恩
免教寂寞老長門
玉顏不信傾人國
爭得呼韓到五原

淮上重送永奉

輕黃柳色綠煙含
欲折行人自不堪
兩岸梨花寒食雨
孤舟今夜泊淮南

夢作

乙卯初夏六日假寢得此
覺而錄之亦不知其解也

白鶴屏寒月影稀
冰精簾卷篆煙微
生憎柳絮如蝴蝶
撩亂春愁處處飛

春意二首

博山宿火暖猶紅
金屋花飛樹樹空
惆悵玉人春夢裡
卷簾二十四番風

游絲芳草閉閒門
愁見羅衣舊酒痕
燕子不來春欲去
杏花滿地月黃昏

懋南旺二首

渡頭沙起浪冥冥
分水分風去不停
試看會通

河上柳南枝零落北枝青

鴻陂一夜鑿成渠石堰堦城鐵不如二百年來
灰帶水至今人說宋尚書

春日遡汶河作

東風殘雪繫蘭橈滿目山川對寂寥記得門前
春水滿美人蕉壓赤欄橋

雨憇山寺作

枇杷葉裡閑招提竹影迴風鳩亂啼微雨過雲
殘日白斷虹雙挂石門西

三月晦日送客

一尊留客惜春心
春去愁添送客深
此夜莫辭花下醉
明朝馬首綠成陰

玉簪花

綠葉離披素萼凝
仙人掌上二條冰
春風處處堪惆悵
白髮年來欲不勝

宮詞

後庭珠樹百花香
一葉梧桐夜已黃
咫尺金階天各別
別裡邊玉露外邊霜

過宸濠故居

西山寂莫大江寒帶礪丹書墨未乾
園館蕭條雞犬去只今猶自說劉安

題桃源圖

雞犬桑麻盡日閒門前流水洞中山
春來檢點桃花片莫遣尋常到世間

水仙

黃金爲蓋玉爲盤霜雪叢中巧耐寒
惆悵東風未相識一枝低傍碧闌干

漫興二十首

生長江南海上山廿年世路損朱顏只今汶水
扁舟夢猶逐雞聲夜度關

岳陽樓前湖水多君山一點黛如螺分明四十
年前事嫋嫋秋風起夜波

四月已破五月來榴花萱草參差開草堂白日
無車馬閒看蝸涎篆古苔

五日東帶一登堂猶苦官船過客忙早起水門
無驛報自携銀筆注青箱

濟南七十二名泉涓滴供輸亦可憐千里金堤
三尺水客船多似運糧船

寒食西風特地寒無花無酒倚闌干女兒不識
春陽暮爭擲金錢買牡丹

五十年來夢乍醒江湖魏闕總飄零漢廷無數
金門客誰識東方是歲星

一春風雪不開門柳色鶯聲別故園回首何娘
池畔它病花中酒幾黃昏

少年翻曲變新聲到處紅樓識姓名二十四橋

橋下水花中畫舸月中行

宦情文意兩無成
粉黛叢中便隔生
惟有春風桃葉在
花時猶自喚卿卿

不學空王不學仙
不求成佛不生天
憑將一點光明眼
參破人間萬種緣

雌雄角逐競中原
紫色蛙聲日月昏
誰道江南有真主
手提一劍定乾坤

柳娘家住廣陵橋
幾度春風鬪舞腰
腸斷瓊花明月夜
玉闌干畔坐吹簫

稚子花前太劇顛，拈蜂撲蝶競紛然。
吳姬睡起偏惆悵，閒數金盆出水蓮。

海內談詩王太原，一時旗鼓屬吳門。
傷心南有堂前月，客散池空草滿園。

徐陳里閤久相親，鍾李湖湘非我隣。
九泥久已封函谷，怕見江東一片塵。

石倉衣鉢自韋陶，吳楚從風赤熾高。
若問老夫成底事，雪山銀海瀉秋濤。

道心久逐鹿麋閒，畏路空屯虎豹關。
却笑漆園

稱傲吏也居才與不才間

鳳背迴風散紫煙前身元住大羅天無端悞度
蓬萊水冷落三花五十年

潦倒乾坤一腐儒動時有念靜時無從他九曲
羊腸路自在虛舟倚槁梧

隋宮怨

廣陵三月御河開鳳輦龍舟去不迴日暮楊花
飛似雪東風吹入故宮來

唐宮怨

棣萼樓頭月半斜
六宮未敢洗鉛華
教坊新進霓裳曲
閒殺東都四萬花

暑中卧二首

早衙放罷卸烏巾
未麗香生蝶近人
坐便看書慵便卧
不知門外有紅塵

一榻松風枕黑甜
生憎夢裏報郵籤
何如別墅東山上
竹影泉聲半卷簾

漢宮怨

團扇清秋鎖不開
官車猶在避風臺
不知赤鳳

緣何事也逐昭陽燕子來

舟中聞笛

短笛高樓秋月深
梅花落盡鴈聲沈
臨流更奏思歸引
一夜孤舟萬里心

題水際看山圖

淡煙殘雨隱重巒
竹裡泉聲夢亦寒
莫道青山隨處是
青山能有幾人看

雨竹

寶瑟聲沈月色昏
湘江猶有老龍孫
黃陵祠上

三更雨盡入枝頭作泪痕

趙承旨晚桃圖

芳草連天怨子規
殘紅猶見背巖枝
春風冷落花隨水
不似仙源洞裏時

白蓮花

華清波冷羽衣灰
玉骨香魂去不回
惟有雙林風露裏
一枝猶傍講堂開

班姬題扇圖

莫向清秋怨寂寥
羅衣曾度可憐宵
東風轉眼

春如舊惟有長門凍不消

古意

征人遙住木蘭舟少婦紅粧正倚樓一片春愁
愁不盡暮煙寒雨水悠悠

宿清溪道士家

一溪流水紫煙遮卧聽松風枕碧霞夜半縵山
霜似月鳳笙吹落玉壇花

舟滯安山

百丈方舟一線泉待風待雨留連客程莫笑

蹉跎甚拙宦何如上水船

張秋桃有名鴈過紅者賦之

一從劉阮別天台又見西風朔鴈迴應有故人
書信到兩腮春色一時開

題藍關風雪圖

潮陽南望海連天匹馬西風凍不前自分蠻荒
投骨去不須回首憶神仙

悼舊二首

琵琶聲斷畫牆西咫尺陽臺路已迷歌扇舞衫

春寂莫玉欄青鳥隔花啼

鏤金玉鈕施僧衣猶帶行雲片片飛自恨不如
梁上燕隔牆銜得落花歸

乙卯閏八月望汶河舟中追憶丙申秋舊
遊懷鄧汝高陳伯孺

白雲清署兩中秋檀板金尊醉未休今日風光
渾不似山陽遂裡水悠悠

溪行

杜宇初歸蜂放衙一溪流水出胡麻東風夜到

春城外開盡溪頭躑躅花

題美人圖

雲和一曲泪痕消背倚東風白玉橋此夜離宮
三十六爲誰憔悴爲誰嬌

見菊

西風吹鴈到天涯何處征人不憶家客髮似霜
身似葉卷簾猶自看黃花

寒食

池塘燕子入新年綠蒲溪橋野寺邊寒食東風

三日雨梨花如雪草如煙

署中殘菊數本悵然有懷

西風黃菊數枝寒却憶平章宅裡看錦障紅妝
三萬樹沈香亭榭玉闌干

鄴宮怨

分得名香泪未消月明歌舞在層霄春深銅雀
花開落空向江東憶三喬

宿僧房留題

夕陽雙樹鎖孤峰隔斷人間萬徑蹤我自醉眠

君入定半牀明月一枝松

題吳山人齋中

松間竹屋淨無塵面面青山絕四隣
童子應門僧打坐隔花小犬吠行人

過王司空故庄

松雲蘿月古城西曾伴高僧過虎溪
叢竹小山人去後白雲無主子規啼

賦得閒門草

野火燒殘春又生東風何地不青青
馬蹄行破

長蘆雜詩二首

落馬坡前片月光，騎鯨橋上海茫茫。不知古寺鐘何處，敲落黃榆一樹霜。

八駿東巡去不迴，空餘望海有高臺。蜃樓散盡瑤池冷，苜蓿無人花自開。

欲到天津望海風雨不果

家住閩山障海塘，夢魂長傍水雲鄉。憐人最是風和雨，不遣看時斷客腸。

滹沱懷古

綠林煙靜水無波莫向尊前感慨多垂柳萬條
舟一葉載將春色過潯沱

行河往返俱值逆風戲作

去日西風水倒流南風歸棹又相留先皇好老
今皇少贏得馮唐雪滿頭

夏宮詞

冰山水殿玉闌干香汗羅衣濕未乾惟有長門
人寂莫夜來風雨不勝寒

白葵花

素心應託白雲鄉，莫逐紅塵向艷陽。
蝶夢不來明月冷，滿天風露濕霓裳。

鵲鵲

啄黍分飛鬪絕能，依人妬殺錦鞦鷹。
白綾半臂東風裡，草色松陰滿五陵。

題鶯

御柳如絲拂曙明，東風百轉繞花城。
于今世路人情別，莫作尋常喚友聲。

題楊妃春睡圖

華清新浴未成粧七寶闌干醉海棠金屋不留
春夢往東風吹送到漁陽

丙辰元日雜詩十首

桃符爆竹歲華新回首長安望紫宸一道條風
開玉曆太平四十四年春

火城夾道曙光微拜舞龍亭禮數稀却憶午門
門外立一聲放仗叩頭歸

數聲鼓角啓重門列炬衙參櫪馬喧上苑有春
回玉輅侍臣無地望銀旂

覓來黃韭共青芹隨俗今朝薦五辛笑把屠蘇
推次第白頭輸與少年人

赤甲黃芽巧耐寒青青細切上春盤長安戚里
爭豪富已有金瓶注牡丹

今年元日異常年瑞雪霏微不夜天惆悵東方
千里目柴門流水斷人煙

膠牙餠片辟邪椒柏酒桃湯次第澆但願平安
今日始病魔窮鬼一時消

三載河臣已及瓜游絲芳草感年華客心似逐

青春色一夜東風到海涯

宦情文意兩蹉跎五十今朝柰老何
莫向青湖乞如願一丘一壑願無多

雪色連朝凍更乾
爐紅酒綠未成驪
故園兄弟看桃李不信征人北地寒

宿清源感事

斜陽欲下孤城閉
曙色初分禁漏停
二十年前歌舞地
亂鴉啼雨滿冬青

舟入京口喜作

橋邊停棹盡眠梳晴日和風百丈遲四野山青
溪樹綠客心渾似到家時

許墅關感舊二首

十二年前此地逢相思無計采芙蓉木蘭舟去
紅顏老月落楓橋半夜鐘

畫舫青簾半面粧爲雲爲雨兩茫茫只緣身作
商人婦斷盡江州司馬腸

葛陽道中雜詩八首

二十年來失路身吳天楚館各風塵閉門三日

黃梅雨寂莫山城無主人

郭外長林霧未開灘聲處處怒風雷
夜來春雨知多少百道寒泉樹杪來

雨中新水漲平沙芳草連天鳥道斜
隔水松門人不閉斷橋流出紫藤花

新晴山氣轉霏微碧草含煙濕未飛
十日客衣香不散東風吹送野薔薇

烏桕成林稻滿畦新篳白酒抱黃雞
老農醉卧無人喚日落子規頭上啼

颭颭青帘揭竹竿麻姑春釀碧雲寒當鑪少婦
嬌無賴偷傍柴門看客官

鵝湖女兒不解粧臨溪汲水看鴛鴦農家夫婿
輕離別不在鄱陽在弋陽

山田百畝足畊芸二麥收來夏已分插得新秧
初出水一番梅雨綠如雲

武夷館食乾魚戲作

山郵草具酒微醺薦得乾魚帶白雲總爲煙霞
成痼疾教人認作武夷君

題蘇中郎牧羊圖

初作附此
時年十三

沙滿氊裘雪滿天
節旄零落海雲邊
上林飛鴈來何晚
空牧羝羊十九年

小草齋集卷之二十九終

小菴集卷之三十

陳留謝肇淛著

友人鄭邦祥校

詩餘

秋夜

搗練子

銀蠟換篆香添涼月窺窓過短簷玉簫沁肌金
剪冷霜花偷入夜明簾

閨意

前調

紅玉膩綠雲香月帳星簾百寶粧眉角枕痕嬌

不洗遠山一線挂斜陽

咏柳

憶王孫二闕

翠絲金縷弄新晴芳草斜陽滿灞陵風送黃鸝
一兩聲不勝情莫與征人唱渭城

嬌肢轉眼綠垂陰愁上春山蹙不禁飛絮隨風
過別隣最關心蘇小門前芳草深

積芳亭四時詞

如夢令四闕

柳色輕搖金縷簾捲東風微雨花氣醉人多半
在小桃紅處傳語傳語休聽杜鵑歸去

枝上綠肥紅瘦。檻外碧荷香透。苒苒新篁鶯
語。蟬聲清晝。知否知否。正是炎蒸時候。

旅鴈殘星數點。桂子芙蓉開遍。皓魄正澄空人
在。瑤臺玉殿。休戀休戀。處處砧聲清怨。

門掩寒山日暮。砌竹敲風淒楚。紙帳峭寒凝況
是。丑更霜露。辜負辜負。窗外梅花無數。

怨別

長相思

愁懨懨病懨懨。困倚東風玉指尖。相思別恨添
花滿。簾月滿。簾總然酸澁不如前。相逢一味

甜

夜景

浣溪沙

柳外飛星拂碧簷
星河明滅夜厭厭
蓮花漏水不須添
蝶夢驚風搖暗竹
花魂隨月度疎簾
愁時莫到畫樓前

閨詞

菩薩蠻

白羅翻雪銀刀冷
綺窓風落梧桐影
玉漏滴下東金爐
火尚紅
夢騎雙紫鳳
那得長成夢月落
畫樓西
天明鵲又啼

寒夜

前調

霜風吹裂鴛鴦瓦
梅梢橫月跡
窓下獸炭一爐
灰燈花落又開
聲聲寒漏碎
困便和衣睡畢
竟夢難成更深恨亦深

別意

憶秦娥

花簇簇惱人一點春
山蹙春山蹙
灞陵金縷滿
湘寒玉
馬蹄芳草年年綠
流螢空照黃金屋
黃金屋獨行獨坐
獨言獨宿

溪上

詞金門

溪水碧倒浸一天秋色隔岸芙蓉香欲滴半醉
嬌無力人倚闌干嘆息驚起一雙鸂鶒望斷
彩雲愁脉脉橫塘霜月白

蓮花樓避暑

清平樂

槐風清晝荔子紅初透水落池塘魚影瘦猶有
蓮花依舊垂楊渡口人還流鶯聲裡花殘不
管世間愁悶斜陽一片青山

客懷

阮郎歸

嬌鶯啼老綠楊枝殘紅踏作泥天涯游子淚沾

衣雨中寒食時
人非去鴈南歸東風又轉西
家山長是夢中歸年來夢也稀

送別

前調

石榴花裏嚶黃鸝輕紅劈荔支炎風瘴雨困人
時那堪更別離
車欲動馬頻嘶斜陽漸漸低
相思只寄鴈南飛山高鴈亦稀

勝畫荔支

浪淘沙二闕

異品出吳航翠袖紅粧溫柔何似白雲鄉縱有
舞靑描不就國色天香
含咲解羅襦玉骨躑

漿黼脂無色墨無光祇是紅顏多薄命雨妬風
狂

金井碧梧飄殘暑初消桂林中觀兩蕭條獨步
此時儂第一質艷香嬌豐肉核仍焦沁齒甘
饒丁香輕吐暗魂銷人倚小樓春不住滿地紅
綃

白牡丹

錦堂春

洗盡絳唇丹頰天然玉骨冰肌紗窓明月香風
冷粉頸半低垂不與梅花同瘦任教柳絮沾

永含愁含恨春多少獨坐捲簾時

桃丘官署

眼兒媚

如帶黃河遶桃丘暇日坐銷憂丁香纔謝葡萄
又放花月春秋回首舊堂巢燕子三載似并
州歸心還在烏衣巷口朱雀橋頭

秋海棠

柳梢青

睡着人兒輕盈弱態的顰嬌姿披綠翻紅春心
較晚秋色相宜最是銷魂何處玉闌外露冷
風吹暈頰初生絳唇半吐此恨誰知

寫懷

西江月

斗帳初迴佳夢落花斷送殘春錦屏銀燭醉紅
裙拚箇今生沒分十載隣窺宋玉數聲琴惱
文君海棠花影月紛紛政是撩人孤悶

咏白牡丹示侍兒

前調

說甚姚黃魏紫休論艷露朝霞亭亭獨立玉無
瑕隱映水晶簾下別有纖纖素手起來洗淨
鉛華問郎儂貌可如花解語能行無價

花前美人

前調

乍見半非半是相看含咲含嗔花因解語總輸
人却占天香風韻寂寂芳心自媚雙雙逸態
橫陳尊前帳裏一般春未識東君屬甚

過高唐

前調

古道連天芳草荒城咽月寒鐘當年歌管沸春
風此日孤燈誰共牆外鶯啼新綠枝頭雨洗
殘紅世情回首總成空休認陽臺閒夢

春閨

鷓鴣天

金屋沈沈宿靄收石池春水綠波流梨花帶雨

啼殘月柳絮因風過小樓
香帶結髮雲浮女
兒渾未識春愁羅衣纔下鞦韆架手捲珠簾上
玉鈎

感舊

木蘭花

流蘇香煖春如霧
青鳥西飛無覓處
催殘楊柳
五更風斷送梨花三寸雨
流鶯乳燕休相妬
油壁青驄迷舊路
連天草色日黃昏
暗抱相思
獨歸去

七夕

鵲橋仙

月鉤已挂霞衣初剪五色雲軒輕舉瑤臺香闕
碧沈沈休浪說爲雲爲雨盈盈一水謾勞烏
鵲咲駕飛鸞歸去莫將天上比人間却轉眼金
風又度

感舊

虞美人

海棠花下清明雨五度春歸去無情南鴈向人
啼誰寄一行離恨向長溪枕邊半臂燈前字
盡濕相思淚問花花亦解人愁却把閒情都付
與東流

無題

踏莎行

杏眼迴波桃腮殢酒小樓深處初攜手柔情猶
自怯東風羅衣輕護香肌瘦數點紅殘一雙
黛皺尋芳拚落他人後天香元自有誰知綠陰
枝上春依舊

訂興公汝翔凌荔支

臨江仙

憶昔紅雲花下宴玉顏嬌映波羅如今又是五
年過校頭風雨少林外露華多一騎紅塵飛
得到天香已自消磨鳳皇江上水微波扁舟乘

興去勝會莫蹉跎

感舊

前調

門對碧桃橋畔臉花羞殺桃花香嬌翠滴玉無
瑕春光誰管領宋玉在西家宿雨殘雲成一
夢東風斷送年華月明雙泪落琵琶玉樓人去
也楊柳暮栖鴉

惜春

蝶戀花

煙煖畫梁雙乳燕荷葉如錢幾點浮萍面樹底
殘紅飛片片黃梅雨過青苔院十二闌干閒

倚遍杜宇聲聲似訴春歸怨金屋玉樓音信斷
竹梢風動鞦韆線

秋暮

蘇帳遮

朔雲高芳草盡纔過重陽陣陣西風緊鴻鴈銜
來青女信最是無情先上愁人髮 炭煙銷香
篆燼月墜江波宿鳥寒無影玳瑁梁空羅帳冷
翠被銀牀孤負鴛鴦錦

慶壽

漁家傲

花壓闌干春霧紫鶯喉柳眼嬌羅綺白玉盃傾

青鳳隨天似水笙歌一派香塵起
月帳霞綃雲作履瑤池飛下三千里
五色鳳毛九龍子人有幾願添海水金彝裡

題黃紫牡丹

聲聲令

霞裾吐艷鴉暈成粧一雙國色占年芳
東風妬殺閒桃李絳脣香對鵝兒柘
帕霓裳繡幙銀牀爭自媚斷人腸
姚池魏館錦成行水邊石畔欲斜陽
問東皇春夢醒轉眼淒涼

寄舊人

江神子

高樓錦帳醉流霞拍紅牙訴琵琶薄命佳人孤
客各天涯別去東風今幾度春去也在誰家
綠殘紅褪暮栖鴉眼波花鬢雲斜往事不堪回
首淚如麻縱有柳絲千萬丈綰不住七香車

惜春

御街行

落紅滿地春無主看嫩柳爭飛絮輕寒猶未捲
重簾最怕五更風雨十分春色九分過了只一
分枝頭住 雙雙紫燕簾前語人不見天將暮
晝長睡起篆煙殘別是一番情緒香肌暗損此

時此恨脉脉誰訴

咏韻谷

滿江紅

畫靜簾閒闌干外玉聲低度猛聽得切切清清
待來又住半畝平分楊柳色一林占斷芭蕉雨
也不管聽了割離腸抽愁緒金影碎天將暮
鶯聲老春又去看錦綳玉版參差出土斗帳輕
調求鳳曲瑣窓斜映盤龍舞任世間萬紫與千
紅無着處

登閩城樓懷古

八聲甘州

倚危闌萬里捲西風一片鴈南飛望釣龍臺上
江空金鎖霜冷苔磯目斷帆檣無數來往送斜
暉年世須臾換斗轉星移却憶無諸開土更
黃龍白馬物是人非況香城宮闕綺閣與朱扉
只留得江山依舊聽閒人把酒醉題詩任茫茫
今來古往何必沾衣

嘉慶二年二月廿七日

小草齋集卷之三十終